

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06 i 51/09), člana 21. Zakona o lokalnoj samoupravi Unsko-sanskog kantona („Službeni glasnik Unsko-sanskog kantona“, broj: 8/11), člana 32. stav 1. tačka 18. i člana 81. Statuta Općine Velika Kladuša („Službeni glasnik Općine Velika Kladuša“, broj: 12/11), Općinsko vijeće Općine Velika Kladuša, na XXVI redovnoj sjednici, održanoj dana 25.03.2019. godine, donijelo je

**U P U T S T V O**  
**za provođenje izbora za članove savjeta**  
**mjesnih zajednica na području**  
**Općine Velika Kladuša**

**I - OPĆE ODREDBE**

**Član 1.**

Ovim Uputstvom uređuju se pitanja koja se tiču: prava i načina predlaganja kandidata za članove savjeta mjesne zajednice (u daljem tekstu: savjet), utvrđivanja i objavljivanja liste kandidata, određivanja biračkih mjesta, imenovanja i načina rada biračkih odbora, sadržaja glasačkog listića za provođenje izbora za članove savjeta, procesa glasanja, utvrđivanja rezultata glasanja, dostavljanja izbornog materijala, rješavanja po prigovorima podnešenim na povrede izbornog postupka, načina sazivanja konstituirajuće sjednice savjeta i drugih pitanja od značaja za zakonito provođenje izbora za članove savjeta.

**Član 2.**

Izbori u mjesnim zajednicama se održavaju svake četiri godine, u godini koja slijedi nakon lokalnih izbora, osim u slučaju kada Općinsko vijeće raspusti savjet mjesne zajednice prije isteka mandata i donese Odluku o raspisivanju prijevremenih izbora. Odluku o raspisivanju izbora za organe mjesne zajednice Općinsko vijeće donosi na prijedlog Općinskog načelnika, najkasnije 30 dana prije isteka mandata postojećih organa mjesnih zajednica.

**Član 3.**

Odlukom o provođenju izbora za članove savjeta mjesnih zajednica naročito se regulišu slijedeća pitanja:

- datum održavanja izbora,
- način provođenja izbora (javno – aklamacijom ili tajno – putem glasačkih listića),
- komisija za provođenje izbora i
- visina naknade za članove Komisije za provođenje izbora i za članove biračkih odbora.

**Član 4.**

Izbori za organe mjesnih zajednica se moraju održati najkasnije 15 dana nakon isteka mandata postojećih organa mjesnih zajednica.

Prilikom donošenja Odluke o provođenju izbora za članove savjeta mjesnih zajednica mora se voditi računa da organi koji provode izbore imaju

dovoljno vremena za kvalitetne pripreme i eventualno ponavljanje neuspjelih kandidacionih zborova.

Izbori se u pravilu održavaju subotom ili nedjeljom.

**Član 5.**

Izbore za članove savjeta mjesnih zajednica na području Općine Velika Kladuša organizuju i provode Komisija za provođenje izbora za članove savjeta mjesnih zajednica Općine Velika Kladuša, Služba za opću upravu i društvene djelatnosti i birački odbori.

Komisiju za provođenje izbora za članove savjeta mjesnih zajednica Općine Velika Kladuša imenuje Općinsko vijeće svojom posebnom odlukom i ista broji 5 članova.

Birački odbor se bira na kandidacionom zboru građana javnim glasanjem za svako biračko mjesto i čine ga tri člana i tri zamjenika.

**Član 6.**

Zadatak Komisije za provođenje izbora za članove savjeta mjesnih zajednica Općine Velika Kladuša je da :

- organizuje i provede kandidacione zborove u saradnji sa predsjednicima mjesnih zajednica za svako naselje u svim mjesnim zajednicama,
- u skladu sa odlukama kandidacionih zborova, utvrdi listu kandidata za članove savjeta mjesne zajednice za svaku mjesnu zajednicu, izradi glasačke listiće, te sačini i dostavi rješenja o imenovanju članova biračkih odbora i njihovih zamjenika za sva naseljena (glasačka) mjesta,
- odredi biračka mjesta najkasnije 15 dana prije dana izbora,
- izradi uputstvo za rad i izvrši edukaciju članova biračkih odbora,
- obezbjedi biračke spiskove po naseljenim (glasačkim) mjestima,
- obezbjedi provođenje izbornog postupka u skladu sa ovim Uputstvom,
- rješava po prigovorima podnesenim na povrede izbornog postupka,
- pruža pomoć organima mjesnih zajednica u organizaciji i opremanju biračkih mjesta,
- na osnovu zapisnika biračkih odbora, utvrdi rezultate izbora za sve mjesne zajednice,
- podnese izvještaj Općinskom vijeću o provedenim izborima i zatražiti potvrđivanje rezultata izbora,
- na osnovu potvrđenih rezultata izbora u mjesnim zajednicama od strane Općinskog vijeća, izda uvjerenje svim izabranim članovima savjeta mjesnih zajednica i predsjednicima savjeta mjesnih zajednica.

Zadatak Službe za opću upravu i društvene djelatnosti je da:

- sačini Prijedlog Odluke o provođenju izbora za članove savjeta mjesnih zajednica na području Općine Velika Kladuša,

- pruža administrativnu i tehničku pomoć Komisiji za provođenje izbora za članove savjeta mjesnih zajednica Općine Velika Kladuša,
- zajedno sa predsjednicima mjesnih zajednica i Komisijom za provođenje izbora organizuje kandidacione zborove građana.

Zadatak biračkog odbora je da:

- izvrši primopredaju biračkog materijala,
- uredi biračko mjesto na način da se omogući nesmetan protok birača na biračkom mjestu,
- obezbjedi tajnost glasanja i slobodu izjašnjavanja,
- ne utječe na volju birača na način da se istom sugerise za koga da glasa,
- daje potrebna uputstva ukoliko ih birač traži, a vezana su za način glasanja,
- licu koje se ne nalazi na biračkom spisku, a isto je građanin te mjesne zajednice, omogućiti da glasa uz predočavanje ličnog dokumenta i potpis, te njegove lične podatke upiše na spisak birača koji su glasali i naznači da li se birač nalazi na biračkom spisku,
- biraču kojem je potrebna pomoć drugog lica prilikom glasanja, omogućiti da glasa uz pomoć drugog lica kojeg on odredi, te vodi računa o tome da lice koje pomaže može samo jednom biti u poziciji da pomaže drugom licu.

#### Član 7.

Članovi Komisije za provođenje izbora i članovi biračkih odbora imaju pravo na naknadu za svoj rad.

Visinu naknade utvrđuje Općinsko vijeće u skladu sa Budžetom Općine Velika Kladuša.

#### Član 8.

Savjet mjesne zajednice biraju građani s područja mjesne zajednice koji imaju opće biračko pravo.

### II – BROJ ČLANOVA SAVJETA PO NASELJENIM MJESTIMA, PREDLAGANJE KANDIDATA I UTVRĐIVANJE KANDIDATSKE LISTE

#### Član 9.

U skladu sa članom 85. Statuta Općine Velika Kladuša, utvrđuje se broj članova savjeta mjesnih zajednica sa područja Općine Velika Kladuša po naseljenim mjestima kako slijedi:

#### Mjesna zajednica Vel. Kladuša ..... 15 članova savjeta;

- Miljkovići .....3 člana,
- Nepeke .....1 član,
- Šiljkovača .....1 član,
- Šmrekovac .....1 član,
- Trnovi .....2 člana,
- Zagrad .....2 člana,
- Velika Kladuša-Grad .....5 članova.

#### 2.Mjesna zajednica Bos. Bojna ..... 5 članova savjeta;

- Bosanska Bojna ..... 2 člana,

- Gradina ..... 3 člana.

#### 3. Mjesna zajednica Glinica .....5 članova savjeta;

- Glinica ..... 2 člana,
- Bukovlje .....1 član,
- Poljana ..... 2 člana.

#### 4. Mjesna zajednica Mala Kladuša 11 članova savjeta;

- Glavica ..... 3 člana,
- Grahovo ..... 2 člana,
- Mala Kladuša ..... 4 člana,
- Marjanovac ..... 2 člana.

#### 5. Mjesna zajednica Podzvizd ..... 13 članova savjeta;

- Klupe ..... 1 član,
- Rajnovac ..... 2 člana,
- Kumarica ..... 2 člana,
- Orčeva Luka ..... 2 člana,
- Podzvizd ..... 3 člana,
- Ponikve ..... 2 člana,
- Drenovac ..... 1 član.

#### 6. Mjesna zajednica Polje ..... 9 članova savjeta;

- Polje ..... 6 članova,
- Trn ..... 3 člana.

#### 7. Mjesna zajednica Slapnica ..... 7 članova savjeta;

- Donja Slapnica ..... 3 člana,
- Gornja Slapnica ..... 4 člana.

#### 8. Mjesna zajednica Šumatac ..... 11 članova savjeta;

- Šabići ..... 3 člana,
- Šumatac ..... 4 člana,
- Kudići ..... 4 člana.

#### 9. Mjesna zajednica Todorovo ..... 13 članova savjeta;

- Čelinja ..... 2 člana,
- Golubovići ..... 2 člana,
- Mrcelji ..... 2 člana,
- Todorovo ..... 3 člana,
- Vejinac ..... 4 člana.

#### 10. Mjesna zajednica Tod. Slapnica 7 članova savjeta;

#### 11. Mjesna zajednica Vidovska ..... 9 članova savjeta;

- Donja Vidovska ..... 3 člana,
- Gornja Vidovska ..... 3 člana,
- Johovica ..... 3 člana.

#### 12. Mjesna zajednica Vrnograč .... 13 članova savjeta;

- Brda ..... 2 člana,
- Dolovi ..... 2 člana,
- Elezovići ..... 2 člana,
- Grabovac ..... 2 člana,

- Šestanovac ..... 1 član,
- Vrnogračka Slapnica ..... 1 član,
- Vrnograč ..... 3 člana.

### **13. Mjesna zajednica Zborište ..... 9 članova savjeta;**

- Crvarevac ..... 3 člana,
- Stabandža ..... 2 člana,
- Zborište ..... 4 člana.

### **14. Mjesna zajednica Čaglica ..... 7 članova savjeta.**

#### **Član 10.**

Prijedlog kandidata za člana savjeta mjesne zajednice mogu podnijeti: građani, organi političkih stranaka, druge organizacije i udruženja koja djeluju na području mjesne zajednice.

Uz svaku kandidatsku listu dostavljaju se i pismene izjave kandidata o prihvatanju kandidature.

Prilikom predlaganja i izbora članova savjeta mjesne zajednice mora se voditi računa da sastav članova odražava približno nacionalnu strukturu stanovništva mjesne zajednice, te da spolovi budu ravnopravno zastupljeni.

Prijedlozi kandidata se podnose pismeno predsjedniku savjeta mjesne zajednice prije održavanja kandidacionog zбора, a mogu se podnijeti, odnosno predlagati i neposredno na kandidacionim zborovima.

#### **Član 11.**

Kada su podnosioci pismenih predloga kandidata građani, prijedlozi moraju biti podržani potpisima građana kako slijedi:

- Ukoliko se radi o kandidaturi pojedinca za člana savjeta mjesne zajednice ista mora biti podržana potpisima najmanje 10 građana iz istog naseljenog mjesta.
- Ukoliko se radi o kandidatskoj listi za izbor dijela članova savjeta mjesne zajednice ista mora biti podržana potpisima 15 građana sa područja istog naseljenog mjesta.
- Ukoliko se radi o kandidatskoj listi za izbor svih članova savjeta mjesne zajednice ista mora biti podržana potpisima 20 građana svih naseljenih mjesta iz iste mjesne zajednice.

#### **Član 12.**

Predloženi kandidat mora da ispunjava slijedeće uslove:

- da na dan raspisivanja izbora ima prebivalište na području mjesne zajednice i naseljenog mjesta za čiji savjet je kandidovan,
- da je upisan u Centralni birački spisak,
- ukoliko je kandidat predložen od strane građana, da ima potrebnu potpisanu podršku građana u skladu sa članom 11. ovog Uputstva.

Svi predloženi kandidati, ukoliko to nisu ranije učinili, potpisuju izjavu o prihvatanju kandidature za članove savjeta, prije izjašnjavanja zбора građana o predloženim kandidatima.

#### **Član 13.**

Komisija za provođenje izbora će utvrditi raspored održavanja kandidacionih zborova građana po naseljenim mjestima iz člana 9. ovog Uputstva.

Građani na kandidacionom zboru na kojem mora biti prisutna najmanje jedna desetina građana sa pravom glasa, javnim glasanjem, između svih predloženih kandidata (prijedlozi kandidata podnešeni u pisanom obliku i kandidati predloženi neposredno na zboru građana) utvrđuju listu kandidata za članove savjeta mjesne zajednice za svako naseljeno mjesto iz sastava mjesne zajednice.

Ukoliko na prvom kandidacionom zboru ne bude prisutna jedna desetina građana sa pravom glasa, Komisija za provođenje izbora će ponoviti kandidacioni zbor, a na ponovljenom kandidacionom zboru utvrdiće se konačna lista kandidata bez obzira na broj prisutnih građana.

#### **Član 14.**

Svako naseljeno mjesto mora na konačnoj listi imati najmanje jednog kandidata za člana savjeta mjesne zajednice.

Broj kandidata na konačnoj listi za izbor u savjet mjesne zajednice iz jednog mjesta mora biti jednak najmanje broju članova savjeta koji se biraju za to naseljeno mjesto, a najviše:

- 2 kandidata na izbornoj listi ako se bira 1 član savjeta,
- 4 kandidata na izbornoj listi ako se biraju 2 člana savjeta,
- 5 kandidata na izbornoj listi ako se biraju 3 člana savjeta,
- 6 kandidata na izbornoj listi ako se biraju 4 člana savjeta,
- 7 kandidata na izbornoj listi ako se bira 5 članova savjeta,
- 9 kandidata na izbornoj listi ako se bira 7 članova savjeta.

U slučaju da dva ili više kandidata za listu za izbor članova savjeta do broja kandidata koji se utvrđuje za pojedina naseljena mjesta, imaju isti broj glasova, glasanje će biti ponovljeno na način da se izvrši ponovno glasanje samo za kandidate koji imaju isti broj glasova.

#### **Član 15.**

Kandidacioni zbor javnim glasanjem bira tri člana i tri zamjenika članova biračkog odbora. Članovi biračkih odbora moraju biti prisutni na kandidacionom zboru i dati pismeni pristanak na svoj izbor.

#### **Član 16.**

Komisija za provođenje izbora za članove savjeta mjesnih zajednica utvrđuje konačnu listu kandidata za članove savjeta mjesne zajednice za svaku mjesnu zajednicu i istu objavljuje najkasnije u roku od 15 dana prije održavanja izbora.

Pojedinačni redoslijed kandidata na listi i glasačkom listiću utvrđuje se prema broju glasova dobijenih na kandidacionom zboru građana.

Objavljivanje konačne liste kandidata vrši se na zvaničnoj web stranici i oglasnoj tabli Općine, kao i oglasnim tablama mjesnih zajednica.

### **III – BIRAČKA MJESTA, BIRAČKI ODBORI, GLASAČKI LISTIĆI, POSTUPAK GLASANJA I AKREDITACIJA POSMATRAČA**

#### **Član 17.**

Glasanje za izbor članova savjeta mjesnih zajednica provodi se na biračkim mjestima.

Biračka mjesta određuje i formira Komisija za provođenje izbora najkasnije 15 dana prije dana određenog za održavanje izbora.

Komisija odmah po određivanju biračkih mjesta objavljuje na kojim se lokacijama nalaze biračka mjesta.

Svako biračko mjesto označava se rednim brojem.

Pod biračkim mjestom smatra se prostorija u kojoj se nalazi biračko mjesto kao i okolni prostor u krugu od 50 metara od ulaza u zgradu u kojoj se biračko mjesto nalazi.

#### **Član 18.**

Biračko mjesto se određuje u zavisnosti od broja birača upisanih u Izvod iz centralnog biračkog spiska (u daljem tekstu: birački spisak).

#### **Član 19.**

Komisija za provođenje izbora dužna je, najkasnije 24 sata prije dana određenog za održavanje izbora, osigurati da prostor koji je određen za biračko mjesto bude obezbjeđen i pripremljen za otvaranje.

#### **Član 20.**

Na biračkom mjestu i njegovoj okolini mogu se postavljati samo službena izborna obilježja.

#### **Član 21.**

Birački odbor je stručno, nezavisno i nepristrasno tijelo Komisije za provođenje izbora koje provodi izbore na biračkom mjestu u skladu sa ovim Uputstvom i drugim propisima.

Birački odbor neposredno rukovodi glasanjem na biračkom mjestu, obezbjeđuje pravilnost i tajnost glasanja, stara se o održavanju reda u toku glasanja, utvrđuje i evidentira rezultate glasanja na biračkom mjestu i vrši druge poslove utvrđene ovim Uputstvom.

Predsjednik biračkog odbora rukovodi radom biračkog odbora i odgovoran je za zakonitost njegovog rada.

#### **Član 22.**

Biračke odbore u skladu sa odlukama kandidacionih zborova građana imenuje pismenim rješenjem Komisija za provođenje izbora za svako biračko mjesto, najkasnije 10 dana prije dana određenog za održavanje izbora.

Birački odbor se sastoji od predsjednika i dva člana i njihovih zamjenika.

#### **Član 23.**

Predsjednik i članovi biračkog odbora i njihovi zamjenici trebaju po mogućnosti imati najmanje srednju stručnu spremu i posjedovati iskustvo u provođenju izbora.

Predsjednik i članovi biračkog odbora i njihovi zamjenici moraju biti upisani u birački spisak.

#### **Član 24.**

Predsjednik i članovi biračkog odbora moraju biti prisutni na biračkom mjestu tokom cijelog procesa glasanja, kao i procedure utvrđivanja rezultata glasanja.

#### **Član 25.**

Glasačke listiće priprema i ovjerava Komisija za provođenje izbora.

Glasački listići se štampaju na listu papira formata A5, bijele boje, a na svaki listić otisnut je pečat Općinskog vijeća Općine Velika Kladuša.

Za potrebe provođenja izbora za svaku mjesnu zajednicu štampa se 30% listića od ukupnog broja birača upisanih u izvod iz Centralnog biračkog spiska za tu mjesnu zajednicu.

U slučaju da svi odštampani glasački listići za područje pojedine mjesne zajednice na dan izbora budu upotrebljeni, na zahtjev biračkog odbora izvršit će se štampanje dodatnog broja glasačkih listića i dostavljanje istih biračkom odboru.

Glasački listić sadrži slijedeće podatke:

1. datum izbora,
2. naziv mjesne zajednice i naznaku da se izbor vrši za članove savjeta mjesne zajednice,
3. imena kandidata po naseljenim mjestima, sa naznakom koliko se članova savjeta bira za određeno naseljeno mjesto,
4. uputstvo o načinu glasanja i
5. pečat Općinskog vijeća.

#### **Član 26.**

Komisija za provođenje izbora će, dan prije otvaranja biračkih mjesta, dostaviti biračkim odborima izborni materijal koji čine:

- birački spisak za određeno biračko mjesto,
- odgovarajući broj glasačkih listića,
- odgovarajući broj glasačkih kutija,
- paravan za glasačku kabinu,
- set obrazaca za biračko mjesto,
- Kandidatska lista,
- Uputstvo o načinu glasanja,
- obrazac Zapisnika o radu biračkog odbora,
- potrošni materijal neophodan za proces glasanja i brojanja glasačkih listića.

O primopredaji izbornog materijala iz stava 1. ovog člana sačinjava se zapisnik na posebnom obrascu.

#### **Član 27.**

Birački odbor je dužan provjeriti da li je izborni materijal iz člana 26. ovog Uputstva za njihovo biračko mjesto potpun i u ispravnom stanju.

Birački odbor je odgovoran za bezbjednost izbornog materijala na biračkom mjestu od trenutka preuzimanja materijala pa sve do okončanja procesa glasanja i predaje izbornog materijala Komisiji za provođenje izbora.

Predsjednik i članovi biračkog odbora postavljaju potrebne oznake biračkog mjesta i izlažu kandidatske liste.

#### **Član 28.**

Predsjednik i članovi biračkog odbora organizuju izgled biračkog mjesta tako da se omogući

nesmetano odvijanje protoka birača na biračkorn mjestu.

#### **Član 29.**

Predsjednik i članovi biračkog odbora su dužni doći na biračko mjesto najkasnije sat prije početka glasanja.

U vremenskom periodu od dolaska biračkog odbora do otvaranja biračkog mjesta samo predsjednik i članovi biračkog odbora rnoгу da budu prisutni na biračkorn mjestu.

#### **Član 30.**

Birački odbor će odrediti mjesto za glasačku kabinu, vodeći računa da niko unutar ili van biračkog mjesta ne može vidjeti birača dok glasa.

Predsjednik biračkog odbora određuje jednog člana biračkog odbora koji će biti zadužen za identifikaciju birača i jednog člana za izdavanje glasačkih listića i kontrolu glasačke kutije. Predsjednik biračkog odbora vrši kontrolu ukupnog postupka glasanja na biračkom mjestu.

#### **Član 31.**

Predsjednik biračkog odbora, osim dužnosti iz člana 30. stav 3. ovog Uputstva, ima i slijedeće nadležnosti i odgovornosti:

- kontroliše postupak glasanja,
- popunjava potrebne obrasce,
- određuje dužnosti svakom članu biračkog odbora,
- pomaže biračima kojima treba dodatno objašnjenje o načinu glasanja i rješava pitanja koja se odnose na identifikaciju i pravo glasa birača,
- evidentira u zapisnik o radu biračkog odbora vrijeme i okolnosti svih nepredviđenih događaja na biračkorn mjestu.

Član biračkog odbora kojega predsjednik biračkog odbora odredi za identifikaciju birača, ima slijedeće dužnosti i odgovornosti:

- provjerava identitet birača,
- pronalazi birača u biračkom spisku,
- vodi računa da se svaki birač potpiše pored svog imena u biračkorn spisku,
- izdaje glasačke listiće,
- objašnjava na koji način se popunjava glasački listić,
- obavještava birača da se, ukoliko glasački listić bude pogrešno ispunjen ili oštećen, rnože dobiti drugi glasački listić,
- evidentira sve upropaštene glasačke listiće u Zapisnik o radu biračkog odbora.

Član biračkog odbora kojega predsjednik biračkog odbora odredi za kontrolu reda, ima slijedeće dužnosti i odgovornosti:

- vrši kontrolu protoka birača na biračkorn mjestu,
- upućuje birača da ubaci glasački listić u glasačku kutiju i da napusti biračko mjesto,
- vodi računa da ni jedan birač ne napusti biračko mjesto dok u glasačku kutiju ne ubaci glasački listić,

- vodi računa da se u glasačku kutiju ubacuje samo glasački listić.

#### **Član 32.**

Sva biračka mjesta počinju sa radom u 07,00 sati, a zatvaraju se u 19,00 sati.

Prije otvaranja biračkog mjesta, članovi biračkog mjesta vrše brojanje glasačkih listića i njihov broj upisuju u obrazac za zbirne rezultate.

#### **Član 33.**

Ako određeno biračko mjesto iz opravdanih razloga, nije otvoreno pravovremeno, a kašnjenje je trajalo do jednog sata, glasanje na tom biračkorn mjestu se rnože produžiti za onoliko vremena koliko je trajalo kašnjenje, o čemu odlučuje predsjednik biračkog odbora.

Ako je kašnjenje otvaranja biračkog mjesta trajalo duže od jednog sata, o dužini vremena za koje se glasanje produžava odlučuje Komisija za provođenje izbora.

#### **Član 34.**

Predsjednik biračkog odbora je dužan da u najkraćem roku, obavijesti Komisiju za provođenje izbora o okolnostima iz člana 33. ovog Uputstva.

#### **Član 35.**

Glasanje na biračkom mjestu se vrši lično i tajno, ispunjavanjem glasačkog listića.

Glasanje se vrši zaokruživanjem rednog broja ispred imena kandidata za kojeg se glasa.

Na glasačkom listiću se može zaokružiti najviše onoliko kandidata koliko se bira članova savjeta sa područja određenog naseljenog mjesta.

Glasački listić na kojem je zaokruženo više kandidata od broja koji se bira smatra se nevažećim.

Predsjednik biračkog odbora dužan je objasniti svakom biraču način glasanja i osigurati tajnost postupka njegovog glasanja.

Tokom postupka glasanja vodi se zapisnik o radu biračkog odbora.

Obrazac zapisnika se dostavlja svakom biračkom odboru, zajedno sa ostalim izbornim materijalom.

#### **Član 36.**

Na zahtjev birača koji je slijep, nepismen ili je fizički nesposoban, a koji je pristupio na biračko mjesto, predsjednik biračkog odbora odobrava primjenu postupka po kojem druga osoba, koju izabere birač koji nije u mogućnosti da glasa, pomaže tom biraču pri glasanju i potpisivanju biračkog spiska.

Osoba koja pomaže pri glasanju ne rnože biti član biračkog odbora .

Osoba iz stava 1. ovog člana napisat će svoje ime štampanim slovima na birački spisak do imena birača kojem je pomogla da glasa i potpisati se na za predviđeno mjesto.

Jedno lice rnože u smislu stava 1. ovog člana pomagati samo jednom biraču.

#### **Član 37.**

Fizički nesposobni birači su i oni birači koji dođu do biračkog mjesta, ali ne mogu da uđu na biračko mjesto.

Drugo lice koje takav birač odabere, treba donijeti identifikacioni dokument fizički nesposobnog birača na biračko mjesto i izjaviti da birač ne može doći na biračko mjesto.

U slučaju iz stava 1. ovog člana, predsjednik biračkog odbora vrši provjeru da li je ime birača upisano u birački spisak.

Ako je birač upisan u birački spisak, predsjednik biračkog odbora uzima Zapisnik o radu biračkog odbora i glasački listić i odlazi do birača.

Predsjednik biračkog odbora zapisuje ime birača i lične podatke u Zapisnik o radu biračkog odbora, a birač se potpisuje pored tih podataka, a zatim ispunjava glasački listić i predaje ga licu kojega je odabrao za pomoć.

Lice koje je birač odabrao za pomoć odnijet će glasački listić do glasačke kutije i ubaciti ga u glasačku kutiju.

#### **Član 38.**

Birač glasa na biračkorn mjestu u kojem je upisan u birački spisak.

Član biračkog odbora kojega je predsjednik biračkog odbora odredio za identifikaciju birača, utvrđuje identitet birača na osnovu važeće lične isprave sa fotografijom.

Važeće lične isprave sa fotografijom su:

1. lična karta,
2. pasoš i
3. vozačka dozvola.

Ako je birač promijenio ime ili prezime, obavezan je uz identifikacioni dokument iz stava 3. ovog člana, dati na uvid odgovarajući dokument o promjeni imena ili prezimena koje je izdao nadležni organ.

#### **Član 39.**

Nakon što birač dokaže svoj identitet i nakon što njegovo ime bude pronađeno u biračkorn spisku, birač se potpisuje pored imena u biračkom spisku.

Poslije identifikacije birača i potpisivanja u spisku, član biračkog odbora iz člana 31. stav 2. ovog Uputstva izdaje biraču glasački listić, a zatim se birač upućuje prema glasačkoj kabini kako bi izvršio glasanje.

Nakon što izvrši glasanje, birač presavija glasački listić i ubacuje ga u glasačku kutiju.

#### **Član 40.**

Birač može glasati samo za kandidate navedene na glasačkom listiću.

Glasanje se vrši na način da se zaokružuje redni broj ispred imena kandidata, a najviše do broja kandidata koliko se bira članova u savjet mjesne zajednice.

#### **Član 41.**

Ako birač ošteti glasački listić, može mu se izdati drugi glasački listić pod uslovom da oštećenje nije namjerno učinjeno i da se članu biračkog odbora, od kojega je birač primio glasački listić, vrati oštećeni glasački listić.

Član biračkog odbora iz stava 1. ovog člana će na oštećenom glasačkom listiću napisati riječ "PONIŠTENO" i potom isti odložiti u za to predviđen koverat, a zatim će biraču izdati drugi glasački listić.

Zamjena glasačkog listića se mora evidentirati u Zapisnik o radu biračkog odbora.

#### **Član 42.**

Predsjednik biračkog odbora, u saradnji sa članovima biračkog odbora, se stara o održavanju reda u toku glasanja na biračkom mjestu.

U slučaju značajnijeg narušavanja reda na biračkom mjestu, predsjednik biračkog odbora može zatražiti intervenciju policije za koje se vrijeme prekida glasanje.

Predsjednik biračkog odbora može sa biračkog mjesta, udaljiti lice koje narušava red na biračkom mjestu, što se upisuje u Zapisnik o radu biračkog odbora.

#### **Član 43.**

Postupak glasanja i prebrojavanja glasačkih listića mogu posmatrati samo akreditirani posmatrači.

Posmatrači mogu postavljati pitanja vezana za izborni proces, ali se ne mogu miješati u izborni proces, niti gledati unutar glasačke kabine.

Komisija za provođenje izbora za članove savjeta mjesnih zajednica akreditira, odnosno izdaje akreditacije posmatračima na osnovu zahtjeva kandidata, ovlaštenog predstavnika političke stranke ili udruženja, koji mora biti podnešen najmanje pet dana prije održavanja izbora,

Zahtjev za izdavanje akreditacija treba da sadrži:

- 1) potpis ovlaštenog predstavnika udruženja građana, političke stranke ili kandidata,
- 2) ime i broj važeće lične karte, te jedinstveni matični broj predloženog posmatrača,
- 3) broj i naziv biračkog mjesta za koje je predložen posmatrač.

### **IV – ZATVARANJE BIRAČKOG MJESTA I BROJANJE GLASOVA**

#### **Član 44.**

Tačno u 19,00 sati, predsjednik biračkog odbora objavljuje zatvaranje biračkog mjesta.

Svakom registrovanom biraču koji se u trenutku zatvaranja biračkog mjesta, bude nalazio ispred biračkog mjesta, odnosno u redu za glasanje, bit će omogućeno glasanje.

Ako je biračko mjesto otvoreno sa zakašnjenjem, ili je došlo do prekida glasanja, postupak zatvaranja biračkog mjesta se pomjera za vrijeme iz člana 33. ovog Uputstva.

Vrijeme zatvaranja biračkog mjesta upisuje se u Zapisnik o radu biračkog odbora.

#### **Član 45.**

Odmah po zatvaranju biračkog mjesta, birački odbor vrši brojanje potpisa na spisku birača koji su glasali i upisuje utvrđeni broj potpisa u obrazac za zbirne rezultate te pristupa brojanju glasova na način da:

- iz glasačke kutije se istresaju svi glasački listići i vrši se prebrojavanje istih,

- u obrazac za zbirne rezultate unosi se ukupan broj glasačkih listića pronađenih u kutiji,
- pristupa se razvrstavanju listića na važeće i nevažeće glasačke listiće,
- nevažeći glasački listići se pakuju u za to predviđenu kovertu i njihov broj se upisuje u obrazac za zbirne rezultate,
- ukupan broj važećih listića se unosi u obrazac za zbirne rezultate, nakon čega se pristupa brojanju glasova po kandidatima pojedinačno, te se za svakog kandidata unosi broj osvojenih glasova na predviđeno mjesto u obrascu za zbirne rezultate,
- nakon prebrojavanja važećih glasačkih listića, isti se pakuju u predviđenu kovertu za važeće glasačke listiće,
- neupotrebljeni glasački listići se prebrojavaju i njihov broj se također unosi na mjesto koje je predviđeno u obrascu za zbirne rezultate i isti se pakuju u posebnu kovertu,
- čitko popunjene obrasce potpisuju svi članovi biračkog odbora,
- sve koverta moraju biti propisno označene sa navedenim nazivom MZ i biračkog mjesta.

Važeći glasački listići su oni na kojima se jasno vidi namjera birača da glasa za određene kandidate.

Nevažeći glasački listić je:

1. ako nije ispunjen, ili je ispunjen tako da nije moguće sa sigurnošću utvrditi kojem
2. kandidatu je birač dao svoj glas,
3. ako su dopisana imena kandidata,
4. ako je precrtavano ili prekríženo ime kandidata,
5. ako se na osnovu oznaka, koje je birač dopisao na glasački listić, kao što je potpis i sl.,
6. može utvrditi njegov identitet,
7. ako je označen veći broj kandidata od broja koji se bira.

## **V – RJEŠAVANJE PO PRIGOVORIMA PODNEŠENIM NA POVREDE IZBORNOG POSTUPKA**

### **Član 46.**

Birači, predstavnici kandidata i kandidati imaju pravo pismenog prigovora na povrede izbornog postupka utvrđenog ovim Uputstvom, Odlukom o provođenju izbora i Uputstvom za rad biračkih odbora u roku 24 sata od momenta kada je povreda učinjena.

Prigovor se podnosi Komisiji za provođenje izbora za članove savjeta mjesnih zajednica na području Općine Velika Kladuša.

Komisija za provođenje izbora za članove savjeta mjesnih zajednica na području Općine Velika Kladuša je obavezna da u roku 48 sati razmotri prigovor i donese Odluku po istom.

Odluka Komisije je konačna i na istu nema prava žalbe.

### **Član 47.**

Ako Komisija utvrdi da prigovor sadrži formalne nedostatke, ili ako je prigovor nerazumljiv, ili

nepotpun, zatražit će od podnosioca prigovora da se uočeni nedostaci otklone u određenom roku.

Ako Komisija ustanovi da prigovor nije blagovremeno podnešen, ili je podnešen od strane neovlaštenog lica, odnosno ukoliko uočeni nedostaci ne budu u ostavljenom roku otklonjeni prigovor će odbaciti.

Ukoliko Komisija utvrdi da je prigovor ispravno podnešen, pristupit će njegovom rješavanju i u tom slučaju može prigovor odbiti kao neosnovan, ukoliko utvrdi da ne postoje povrede izbornog postupka, odnosno razlozi zbog kojih je prigovor podnešen.

Ukoliko Komisija utvrdi da je prigovor osnovan i da je učinjena povreda izbornog postupka naložit će otklanjanje učinjene povrede izbornog postupka, a ovisno o težini učinjene povrede može naložiti ponovno prebrojavanje glasova ili ponovno provođenje određene radnje na koju se prigovor odnosi (utvrđivanje kandidatske liste, postupak glasanja i sl.).

## **VI – DOSTAVLJANJE IZBORNOG MATERIJALA KOMISIJI ZA PROVOĐENJE IZBORA**

### **Član 48.**

Članovi biračkog odbora su dužni predati sav izborni materijal sa uredno popunjenim obrascima i zbirnim rezultatima, Komisiji za provođenje izbora za članove savjeta mjesnih zajednica na području Općine Velika Kladuša.

Predaja izbornog materijala se vrši odmah po završetku rada biračkog odbora i utvrđivanja rezultata glasanja, a najkasnije 6 (šest) sati po zatvaranju biračkog mjesta.

## **VII – UTRVRĐIVANJE ZBIRNIH REZULTATA GLASANJA I POTVRĐIVANJE REZULTATA IZBORA**

### **Član 49.**

Na osnovu zapisnika biračkih odbora Komisija za provođenje izbora za članove savjeta mjesnih zajednica na području Općine Velika Kladuša utvrdit će zbirne rezultate izbora i u roku od 48 sati objavit će na odgovarajući način prve preliminarne rezultate izbora za članove savjeta Mjesnih zajednica na području Općine Velika Kladuša.

### **Član 50.**

Za članove savjeta mjesne zajednice izabrani su oni kandidati koji dobiju najveći broj glasova do broja koliko se članova savjeta bira iz određenog naseljenog mjesta.

Kandidat sa liste za izbor članova savjeta mjesne zajednice sa najvećim brojem glasova je predsjednik savjeta mjesne zajednice i po funkciji je predsjednik mjesne zajednice.

### **Član 51.**

U slučaju da dva ili više kandidata do broja koliko se bira članova u savjet mjesne zajednice dobiju isti broj glasova, izabran je kandidat ženskog pola.

Ako kandidati istog pola do broja koliko se bira članova u savjet mjesne zajednice dobiju isti broj glasova, izabran je mlađi kandidat.

Ako među kandidatima koji su dobili najveći broj glasova do broja koliko se bira članova u savjet mjesne zajednice nema najmanje 30% žena, izabranim će se smatrati oni kandidati iz reda žena prema broju dobijenih glasova, i to onoliko kandidata koliko je potrebno da udio žena u savjetu bude 30%, ukoliko je takvih kandidata bilo na listi.

#### **Član 52.**

U roku od 30 dana Komisija za provođenje izbora za članove savjeta mjesnih zajednica na području Općine Velika Kladuša podnijet će Izvještaj o provedenim izborima Općinskom vijeću Općine Velika Kladuša i zatražiti potvrđivanje Izbornih rezultata.

#### **Član 53.**

Rezultate izbora za članove savjeta mjesne zajednice potvrđuje Općinsko vijeće u roku 30 dana od dana završetka izbora u mjesnim zajednicama.

Općinsko vijeće će donijeti Odluku o potvrđivanju rezultata izbora za članove savjeta mjesnih zajednica ako je na izbore izašla jedna desetina građana sa pravom glasa upisanih u Izvod iz centralnog biračkog spiska za područje mjesne zajednice, odnosno najmanje 100 birača u mjesnim zajednicama u kojima je jedna desetina birača veća od tog broja.

Općinsko vijeće će donijeti Odluku o ponovnom raspisivanju izbora za članove savjeta mjesne zajednice za koje utvrdi da nisu ispunjeni uslovi iz prethodnog stava ovog člana, kao i u slučaju ako utvrdi da je u izbornoj proceduri došlo do nepravilnosti koje imaju utjecaja na rezultate glasanja.

Konačni rezultati izbora objavljuju se u „Službenom glasniku Općine Velika Kladuša“, na oglasnoj tabli Općine, oglasnim tablama u mjesnim zajednicama, internet stranici Općine i na drugi uobičajeni način.

#### **Član 54.**

Komisija za provođenje izbora u roku od osam dana od dana potvrđivanja izbornih rezultata izdaje uvjerenja izabranim članovima savjeta i zakazuje konstituirajuće sjednice savjeta mjesnih zajednica.

Konstituirajućom sjednicom savjeta predsjedava izabrani član savjeta sa najvećim brojem dobijenih glasova.

Na konstruirajućoj sjednici bira se zamjenik predsjednika savjeta mjesne zajednice.

Pored novoizabranih članova savjeta mjesne zajednice sjednici obavezno prisustvuje i stručni saradnik za mjesne zajednice Općinskog organa uprave Općine Velika Kladuša.

Izabrani članovi savjeta mjesnih zajednica, nakon izvršenog potvrđivanja rezultata izbora od strane Općinskog vijeća, dužni su potpisati izjavu o prihvatanju mandata koju im, zajedno sa uvjerenjem o izboru, uručuje Komisija za provođenje izbora za članove savjeta mjesnih zajednica.

U slučaju odbijanja prihvatanja mandata, kao i prijevremenog prestanka mandata člana savjeta mjesne zajednice, mandat se dodjeljuje slijedećem kandidatu sa najvećim brojem glasova za određeno naseljeno mjesto.

## **VIII – ZAVRŠNE ODREDBE**

#### **Član 55.**

Sredstva za provođenje izbora za članove savjeta mjesnih zajednica obezbjeđuju će se u Budžetu Općine Velika Kladuša.

#### **Član 56.**

Nadzor nad provođenjem ovog Uputstva vrši Služba za opću upravu i društvene djelatnosti Općine Velika Kladuša.

#### **Član 57.**

Na pitanja koja nisu regulisana ovim Uputstvom primjenjuju se odredbe Izbornog zakona Bosne i Hercegovine i podzakonskih akata Centralne izborne komisije Bosne i Hercegovine.

#### **Član 58.**

Ovo Uputstvo stupa na snagu danom objavljivanja u „Službenom glasniku Općine Velika Kladuša“.

OPĆINA VELIKA Kladuša  
OPĆINSKO VIJEĆE

PREDSJEDAVAJUĆI  
OPĆINSKOG VIJEĆA  
Fikret Bašić, prof.s.r.

Broj: 01-05-94-1/19  
Velika Kladuša, 25.03.2019. godine